



Bosna i Hercegovina  
Federacija Bosne i Hercegovine  
Bosansko-podrinjski kanton Goražde  
**MINISTARSTVO ZA BORAČKA PITANJA**

**P R A V I L N I K**  
**O USLOVIMA, NAČINU I KRITERIJIMA ZA OSTVARIVANJE PRAVA NA**  
**PARTICIPACIJU TROŠKOVA ZA NABAVKU LIJEKOVA KOJI NISU NA**  
**ESENCIJALNOJ LISTI**

Goražde, februar 2020.godine

Na osnovu člana 56. i 66. Zakona o organizaciji uprave u Federaciji BiH («Službene novine FBiH» broj: 35/05) i člana 54. Zakona o dopunskim pravima branilaca i članova njihovih porodica u Bosansko-podrinjskom kantonu Goražde («Službene novine Bosansko-podrinjskog kantona Goražde» broj: 9/13, 11/14 i 15/19), Ministar za boračka pitanja Bosansko-podrinjskog kantona Goražde **d o n o s i**:

## **P R A V I L N I K**

### **O USLOVIMA, NAČINU I KRITERIJIMA ZA OSTVARIVANJE PRAVA NA PARTICIPACIJU TROŠKOVA ZA NABAVKU LIJEKOVA KOJI NISU NA ESENCIJALNOJ LISTI**

#### **POGLAVLJE I-OSNOVNE ODREDBE**

##### **Član 1.** **(Osnovne odredbe)**

Ovim Pravilnikom definišu se korisnici prava, uređuju način i postupak ostvarivanje prava na participaciju troškova za nabavku lijekova koji nisu na esencijalnoj listi, podnošenje zahtjeva, obavezna dokumentacija, uslovi za ostvarivanje prava, prioriteti pri ostvarivanju prava, kriteriji za utvrđivanje visine sredstava koja se odobravaju, način realizacije i finansiranje ostvarenog prava.

##### **Član 2.** **(Korisnici prava)**

Pravo na dodjelu novčanih sredstava iz Budžeta Ministarstva za boračka pitanja (u daljem tekstu: Ministarstvo) na participaciju troškova za nabavku lijekova koji nisu na esencijalnoj listi mogu ostvariti lica iz člana 52. i 53. Zakona o dopunskim pravima branilaca i članova njihovih porodica („Sl. novine BPK Goražde “ broj: 9/13, 11/14 i 15/19), (u daljem tekstu: Zakon) ukoliko to pravo ne mogu ostvariti po drugom osnovu.

##### **Član 3.** **(Objava javnog poziva)**

Ministarstvo za svaku godinu objavljuje javni poziv za ostvarivanje prava na participaciju troškova za nabavku lijekova koji nisu na esencijalnoj listi po usvajanju Budžeta Bosansko-podrinjskog kantona Goražde (u daljem tekstu: Kanton) i programa o utrošku sredstava.

#### **POGLAVLJE II-NAČIN I POSTUPAK OSTVARIVANJA PRAVA NA PARTICIPACIJU TROŠKOVA ZA NABAVKU LIJEKOVA KOJI NISU NA ESENCIJALNOJ LISTI**

##### **Član 4.** **(Način podnošenja zahtjeva)**

(1) Zahtjev za ostvarivanje prava na participaciju troškova za nabavku lijekova koji nisu na esencijalnoj listi za lica iz člana 2. ovog Pravilnika podnose Ministarstvu na propisanom obrascu (Obrazac 3).

(2) Podneseni zahtjevi za ostvarivanje prava iz stava 1. ovog člana važe za budžetsku godinu u kojoj su podnijeti.

## **Član 5.** **(Obavezna dokumentacija)**

(1) Obavezna dokumentacija koju dostavljaju svi podnosioci zahtjeva za ostvarivanje prava na participaciju troškova za nabavku lijekova koji nisu na esencijalnoj listi:

- a) Zahtjev sa tačnom adresom, brojem kontakt telefona i brojem žiro-računa ;
- b) Dokaz o statusu branioca iz člana 1. Zakona;
- c) Fotokopija lične karte podnosioca zahtjeva;
- d) Dokaz o mjestu prebivališta podnosioca i svih punoljetnih članova porodičnog domaćinstva;
- e) Kućna lista;
- f) Uvjerenje da se podnosilac zahtjeva i punoljetni članovi njegovog porodičnog domaćinstva nalaze na evidenciji Službe za zapošljavanje (za nezaposlene) ili dokaz o visini primanja (po osnovu radnog odnosa, boračko-invalidske zaštite, penzije, samostalne djelatnosti i drugih osnova) ili dokaz o redovnom školovanju;
- g) Relevantnu medicinsku dokumentaciju;
- i) Predračun/original račun troškova liječenja, odnosno nabavke lijekova.

## **Član 6.** **(Opći uslovi za ostvarivanje prava na participaciju troškova za nabavku lijekova koji nisu na esencijalnoj listi)**

(1) Pod uslovom da podnosioci zahtjeva imaju prebivalište-boravište na području Kantona, opći kriterij za ostvarivanje prava na participaciju troškova na ime nabavke lijekova koji nisu na esencijalnoj listi da podnosioci zahtjeva pripadaju jednoj od kategorija boračkih populacija i to:

- a) Demobilizirani branilac (uvjerenje nadležnog organa o pripadnosti Oružanim snagama u periodu 18.09.1991. do 22.04. 1996.god, najmanje jednu godinu dana);
- b) Ratni vojni invalid (rješenje nadležnog općinskog organa);
- c) Član porodice šehida i poginulih i nestalih boraca i umrlih ratnih vojnih invalida (rješenje nadležnog općinskog organa).

## **Član 7.** **(Posebni uslovi za ostvarivanje prava)**

(1) Pod posebnim uslovom za ostvarivanje prava na participaciju troškova na ime nabavke lijekova smatra se da ukupna novčana neto primanja, uključujući i primanja po osnovu socijalne i boračko invalidske zaštite, iznose do 15% po članu domaćinstva prosječne netto plaće isplaćene u Federaciji BiH u predhodnoj godini.

(2) Za nabavku lijekova i liječenje za koje je utvrđena uzročno-posljedična veza na osnovu zadobijene rane, povrede ili oboljenja tokom službe u Oružanim snagama, za ratne vojne invalide utvrđeni cenzus iz predhodnog stava ovog člana se ne odnosi.

(3) Izuzetno licima iz člana 2. ovog Pravilnika koja dokažu da su u izuzetno teškoj materijalno-socijalnoj situaciji, uz saglasnost Ministra može se dodijeliti participacija troškova za nabavku lijekova/liječenje, čija ukupna novčana neto primanja neznatno prelaze utvrđeni cenzus u stavu 1. ovog člana, odnosno do 2% prosječne netto plaće isplaćene u Federaciji BiH u predhodnoj godini, ukoliko ispunjavaju opće uslove definisane ovim Pravilnikom.

## **Član 8.**

### **(Nalaz i mišljenje ljekara specijaliste o postojanju uzročno-posljedične veze rane, povrede i bolesti zadobijene tokom učešća u odbrani Bosne i Hercegovine)**

(1) O potrebi nabavke lijekova koji se ne nalaze na esencijalnoj listi, a neophodni su za liječenje od posljedica rana, povreda ili oboljenja zadobijenih tokom učešća u odbrani Bosne i Hercegovine, nalaz i mišljenje daje ljekar specijalista odgovarajuće medicinske struke (u daljem tekstu: ljekar specijalista) nadležne zdravstvene ustanove na području Kantona.

(2) U skladu sa medicinskim načelima i praksom ljekar specijalista po utvrđenoj dijagnozi **na poledini recepta konstatuje uzročno-posljedičnu vezu** odnosno nabavku lijeka koji je neophodan za liječenje od posljedica rana, povreda ili oboljenja zadobijenih tokom učešća u odbrani Bosne i Hercegovine, što ovjerava faksimilom i pečatom.

(3) U opravdanim slučajevim, Ministarstvo može zatražiti od Instituta za medicinsko vještačenje zdravstvenog stanja nalaz i mišljenje o uzročno-posljedičnoj vezi rane, povrede ili oboljenja zadobijenog tokom učešća u Oružanim snagama i dijagnoze na osnovu koje je lice iz člana 2. ovog Pravilnika uputilo zahtjev za odobravanje sredstava na ime nabavke lijekova/liječenja.

(4) Lica iz člana 2. ovog Pravilnika prilikom obraćanja ljekaru dužna su dostaviti na uvid Rješenje o priznatom statusu ili medicinsku dokumentaciju koja potječe iz ratnog perioda.

## **Član 9.**

### **(Obavezno preuzimanje original računa za preuzete lijekove)**

(1) Lica iz člana 2. ovog Pravilnika po preuzimanju pravilno propisanog i ovjerenog recepta vrše nabavku propisanih lijekova u nekoj od ustanova registrovanih za vršenje ove djelatnosti u Bosni i Hercegovini, uz obavezno preuzimanje original računa za preuzete lijekove.

(2) Po preuzimanju recepta od ordinirajućeg ljekara, korisnik je dužan izvršiti fotokopiranje istog, a koji će koristiti u daljem postupku kao bitan dokaz radi ostvarivanja prava na refundaciju sredstava uplaćenih za nabavku lijekova.

## **POGLAVLJE III- KRITERIJI ZA UTVRĐIVANJE VISINE SREDSTAVA**

### **Član 10.**

#### **(Visina sredstava koja se može odobriti po osnovu uzročno-posljedične veze)**

(1) Troškove nabavke lijekova, koji se ne nalaze na esencijalnoj listi, a neophodni su za liječenje posljedica od rana, povreda ili oboljenja zadobijenih tokom učešća u Oružanim snagama u odbrani Bosne i Hercegovine za ratne vojne invalide, snosi Ministarstvo u skladu sa mogućnostima, ukoliko to pravo ne mogu ostvariti po drugom osnovu.

(2) Visina sredstava iz predhodnog stava ovog Pravilnika odredit će se isključivo na osnovu računa/predračuna izdatog od strane nadležne zdravstvene ustanove i raspoloživih sredstava u Budžetu za predmetne namjene.

(3) Maksimalan iznos sredstava za nabavku lijekova koji nisu na esencijalnoj listi iz stava 1. ovog člana može se odobriti do visine osam prosječnih netto plaća isplaćenih u Federacija BiH u predhodnoj godini, za jednu budžetsku godinu.

### **Član 11.**

#### **(Visina sredstava koja se može odobriti korisnicima kod kojih nije utvrđena uzročno-posljedična veza)**

(1) Ukoliko ne mogu ostvariti po drugom osnovu participaciju troškova nabavke lijekova koji nisu na esencijalnoj listi, ratni vojni invalidi kod kojih nije utvrđena uzročno-posljedična veza po osnovu rane, povrede, ozlijede ili bolesti zadobijene tokom službe u Oružanim snagama sa teškom materijalno-socijalnom situacijom, Ministarstvo participira do iznosa jedne prosječne netto plaće isplaćene u Federaciji BiH u predhodnoj godini u toku jedne kalendarske godine.

(2) Pravo na participaciju troškova za nabavku lijekova imaju članovi porodice šehida/poginulog branioca i demobilisani branioci pod uslovima i visini troškova definisanih predhodnim stavom ovog Pravilnika.

(3) U slučaju kada odobrena budžetska sredstva nisu dovoljna, odnosno nisu dostatna za rješavanje svih podnesenih zahtjeva za odobravanje jednokratne novčane pomoći za nabavku lijekova za tu budžetsku godinu, iznos jednokratne novčane pomoći za nabavku lijekova koji nisu na esencijalnoj listi može biti i niži od iznosa utvrđenog ovim Pravilnikom, uz procentualno smanjenje iznosa novčane pomoći do 50% o čemu odluku donosi Ministar.

### **Član 12.**

#### **(Učešće u sufinansiranju nabavke lijekova Zavoda zdravstvenog osiguranja)**

(1) Troškove nabavke lijekova iz člana 52. i 53. Zakona za koje u skladu sa važećim propisima refundira Zavod zdravstvenog osiguranja Bosansko-podrinjskog kantona Goražde, Ministarstvo će isplatiti razliku između stvarne cijene koštanja lijekova i visine isplaćenih sredstava na ime refundacije od strane Zavoda, u visini na godišnjem nivou do jedne netto prosječne plaće isplaćene u Federaciji BiH u predhodnoj godini.

### **Član 13.**

#### **(Maksimalan iznos sredstava koja se mogu odobriti i nadležnost za donošenje rješenja)**

(1) Odobrena sredstva za potrebe nabavke lijekova ne mogu biti manja od 6% niti u većem iznosu od osam prosječnih netto plaća isplaćenih u Federaciji BiH u predhodnoj godini.

(2) Pravo na participaciju lijekova koji nisu na esencijalnoj listi i koji se ne mogu obezbjediti po drugom osnovu priznaje se rješenjem koje donosi Ministar.

(3) Donošenje rješenja za utvrđivanje prava na jednokratnu novčanu pomoć za plaćanje troškova lijekova vršit će se na osnovu poslednje prosječne isplaćene netto plaće u Federaciji BiH u predhodnoj godini, objavljene od strane Federalnog zavoda za statistiku.

## **POGLAVLJE IV-FINANSIRANJE**

### **Član 14.**

Finansiranje prava iz ovog Pravilnika za svaku godinu obezbjeđuje se do visine sredstava odobrenih za ove namjene u Budžetu Kantona.

## **POGLAVLJE V-PRELAZNE I ZAVRŠNE ODREDBE**

### **Član 15. (Original račun o namjenskom utrošku sredstava)**

(1) Lica iz člana 2. ovog Pravilnika koja ostvare pravo na participaciju troškova nabavke lijekova /liječenja na osnovu predračuna troškova za predmetne namjene, obavezuju se da u roku od 30 dana od dana isplate sredstava iz Budžeta, Ministarstvu naknadno dostave original račun (fiskalni račun) nabavke lijekova po osnovu propisane dijagnoze.

(2) Lica iz predhodnog stava koja u roku propisanim ovim Pravilnikom, ne dostave original račune za preuzete lijekove, smatrat će se da su odobrena sredstva utrošena nenamjenski čime gube pravo na ostvarivanje participacije za nabavku lijekova koji nisu na esencijalnoj listi u narednom periodu, uz obavezu povrata isplaćenih sredstava u budžet Kantona.

### **Član 16. (Primjena općih propisa)**

Za sve što nije regulisano ovim Pravilnikom primjenjuju se opći propisi.

### **Član 17. (Način izmjena i dopuna)**

Izmjene i dopune ovog Pravilnika se vrše na način i po postupku koji važi za njegovo donošenje.

### **Član 18. (Tumačenje odredbi)**

Tumačenje odredbi ovog Pravilnika daje Ministar za boračka pitanja.

### **Član 19 (Stupanje na snagu)**

Ovaj Pravilnik stupa na snagu danom dobijanja saglasnosti od Vlade Bosansko-podrinjskog kantona Goražde, a naknadno će se objaviti u „Službenim novinama BPK Goražde“.

Broj: 11-11-160/20  
Goražde, 13.02.2020.godine

**MINISTAR**

Edin Aganović

Na ovaj Pravilnik Vlada Bosansko-podrinjskog kantona Goražde dala je saglasnost svojom Odlukom broj: 03-11-248/20 od 10.02.2020.godine.